



GARMENDIA ETXABE familia

ZUAZTI Elbarrena auzoko baserria da. Bere inguruko baso eta zelaian izenen artean daude *Etxeburu, Arre alde, Etxe azpi, Angoiti, Nazal baso, Okorro*.

Baserritik herrira, elizara, hogeiren bat minutu dau-de. Serapio Mujikak dioenagatik, 1865ean egin zen Ordiziatik Zaldibira bitarteko bidea.

Etxejabe dira *Zuaztikoak* 1916az geroztik. Baserria erosteko Ordiziako Jauregi Botikakoek eman omen zien maileguan dirua. 1950ean berritu zuten baserria eta baita hazi ere. 1970. urtean Inazio Garmendiak, aita, izan omen zuen *Gurutzeta* baserria erosteko aukera, baina une hartan semeek ez zuten baserrian jarraitzeko asmorik, eta ez zuen erosi. Handik hamar urtera berriz, zer gertatuko, eta bi semeak baserrira itzuli ziren lanera.

Baserrian baziren bospasei behi eta bertan egiten zituzten garia, artoa, patata... Ordiziako ferian saltzen zituzten gaztaina, sagarrak eta etxean ekoiztutakoak.

Joxe Frantzisko Garmendia eta Joxepa Antonia Garmendia 1916an ezkondu ziren. Joxe Frantzisko Garmendia *Zaldibarrenekoa* zen, Elbarrena auzo berekoa beraz.

Inazio Garmendia eta Bitoriana Etxabe 1946an ezkondu ziren Lezon. Bitoriana *Goskindi* baserritik etorri zen. Ama gaixo zegoelako ez zuten bazkaririk egin. Ezkontza-bidaian Bilbo eta Zaragozara joan omen ziren. Egun berean beste bikote bat ezkondu zen, Ebaristo Lasa eta Sinforosa Aiesta-

ran, *Konfiteri* etxekoak. Hauek ere ez omen zuten aparteko bazkari ospakizunik egin eta elkarrekin otordua egin eta elkarrekin egin omen zuten bidaia zati bat.

Aita-amekin eta Inazioren bi anaia-arrebekin batera bizi izan ziren. Batek hamalau urte egin zituen baserrian eta bestea beti bertan bizi izan da. Hala ere, etxetik kanpo lau lagunek lan egin izan dute.

Bost seme-alaba izan zituzten: Jabier, Maria Jexux, Damian eta Joxemari. Joxemari izeneko beste zaharrago bat sei urterekin hil zitzairen.

Baserriaren arrastoa idatzietan

J. C. Guerrak, 1895ean REVISTA BASCONGADAn argitaratzen hasi zen *Ensayo de un padrón histórico de Guipúzcoa según el orden de sus familias pobladoras* lanean, Zaldibiko Fernando de Zugasti aipatzen du 1399an. Eta litekeena da orduko hartan Zugasti etxe-izena eta abizen ere izatea.

Ziurrenera J.C. Guerrak informazio hori P. Gorosabelengandik jasoko zuen *Guipuzcoa. Diccionario histórico-geográfico-descriptivo de los pueblos de España* delakotik. Han Fernando de Zugastiz gain agertzen dira beste hainbat zaldibitar ere, orduko Oridicia-ra elkartuz 1399ko apirilaren 8an.

Pasadizoak

"Boterez" ezkondu

1948an Inaziok, Goskindi baserriko Saturnina koinatarekin egin behar izan zituen ezkontza-paperak, alegia, "boterez" ezkondu, Saturnina Ameriketara senar, Klaudio, izango zuenarengana joan ahal izateko. Noski, eliza-ezkontza eta guzti egin zuten.

Informazio emailea:
Damian Garmendia



GARMENDIA GARMENDIA familia. 1960

Ordizian ateratakoa. Joxe Mari, Maria, Julita, Justina, Inazio / Joxe Frantzisko (aita), Bentura, Josefa Antonia (ama).



GARMENDIA ETXABE familia. 1960

Familia numerosako paperak egiteko ateratakoa.

Bitoriana (ama), Jabier, Maria Jexux, Damian, Inazio (aita) eta Joxe Mari (besoetan).

Familia osatzeko Joxe Mari falta da, sei urte zituela hildakoa.